

One pitite djon.ne pouyète, li pus bèle dèl covéye,
Dispû qu'èlle a dès plumes, toûne li dos aus coquias ;
Quite à n' pus paurtadjî avou zèls lès dinréyes,
Èle si plaît mia à l'air aus tchamps avou lès vias.
Todi 'nn'aler pus lon èt s' dire qu'èlle èst chapéye,
Qui tos cès courauds là n' vèront pus l'embêter.
Tot roviaut d' waîtî l'eûre, ça fait one sinte apéye
Qu'èle si r'trove lon èri di s' poli : « Qui va dj' fé ? »
Èle rivint su sès pas divant qui l' nêt arive ;
« On côp qui l' nwâreû tchaît, dj'a l' pèpète à paumer !
I m' faut lancî, couru maugré qui l' vint èst vif. »
Mins èle n'a nin vèyu on vî r'naud tot drané
Què l'atauche djintimint come on vî camarâde ;
Èle tron.ne su sès deûs pates, mins i l' vout rapaujî.
I prend one vwès d' bauchèle, bin fé aler sès âdes,
Dismètant qu' nosse pouyète s'a mètu à priyî.
On lî a dit cint côps qu'i faut qu'on s' dimèfyie
Di tot ç' qui r'chone aus r'nauds qui vont j'qu'à s' disguîjî ;
Qu'i vaureut branmint mia moru cause dèl pèpîye !
Si dêrène eûre èst là ! I nè l' va nin bambî.
« Mamesèle, di-st-i li r'naud, vos l'èstoz, disseûléye !
Vos n'èstoz nin l' prumêre, i n' faut nin awè peû !
Dji v' va d'ner on côp d' mwin tot finichant m' toûrnéye,
Nos sèrans byin pus fwârts, pus francs, pus sûrs à deûs.
Dji n' vos vou nin sbarer, mins dji comprind qu'on tron.ne
Quand on tchaît baube à baube à l' nêt avou on r'naud ;
Mi ossi, dj'ènn'a fait do mau quand dj'èsteu djon.ne,
Mins dji m' vou ratraper d' fé souffri à maulevau.
Dji n' saureu fé candjî lès djon.nias qui rîrin.n'
S'i m'ètindrin.n' prêtchî : " Djokez vos èt m' choûter ! ",
Mins dji cour divant zèls quand dj'aprint qu'i vòrin.n'
Bin ataqer l' pouyetrîye po l' prévenu èt l' chaper.
Vos-avoz co dèl chance, dj'aleûve è vosse maujone
Po-z-advêrti l' famille qui, ç' côp ci, c'è-st-à s' toû.»
Li pouye, qu'èst d' boune crwèyance, l'î mwin.ne pusqu'i lî chone
Qu'il a r'niyî tayons, ratayons, frères èt soûs.
À pwin.ne s' èlle a yeû l' timps d' douviè l'uch à l' blanke panse
Qui tot èsteut stron.né d'au pus grand j'qu'au pus p'tit ;
Tot purdant s' doûce alin.ne, il aveut totes lès chances
D'amôdurer l' pouyète què lî v'leut fé plaïji.
On s' duvreûve dimèfyî do troupia d' faus-pilâtes
Qui nos vègnenut tchanter qui l' solia lûrè d'mwin ;
Lès p'titès grètes d'ayîr vont toûrner à churâdes !
Vos pôroz todi dire qui vos n'è savîz rin.

Albert Delvaux